

四庫全書

集部

欽定四庫全書

集部
古歡堂集卷三十二

詳校官侍講學臣法式善

助教臣常循覆勘

總校官庶吉士臣何思鈞

校對官中書臣石鴻緒

謄錄監生臣姚希慶

欽定四庫全書

古歡堂集卷三十二

戶部侍郎田雯撰

銘表

朱母李太恭人墓銘

雯嘗謂孝經十八篇禮記奔喪祭義諸章孝道大備而
人子之至情無與焉言情者莫善於詩之小雅南陔白
華笙詩無辭不可得而考也小宛之歌曰明發不寐有
懷二人則其情深矣至於劬勞興哀鮮民致歎君子於

此掩卷流涕昔之人有欲廢之者情之悲而不自已也
若夫四牡之什豈不懷歸將母來諭數語出於朝廷體
人子思親之心慰勞使臣以引伸其大義三復流連有
不忍卒讀者夫君之體臣如此恩遇不可謂不厚而臣
子聞之有動於中私心自計不遑將母慮一旦貽沒齒
之憾所謂事君之日長事親之日短也情之至也故人
子之事親也亦祇以承膝下之歡循禮明志已耳如必
效虞潭加金紫立養堂故事則茅季偉之鷄黍郭林宗

何以稱之。小人有母，未嘗君之羹，願考叔之告鄭莊也。請以壺飧遺母。趙宣子之憫翳桑餓人也，稽其事，思其情有足悲者，雲不肖馳驅萬里，累吾母倚閭者有年，自顧無尺寸長可以裨益君父，忽罹大故，遠隔於瘴雨蠻烟之外，蓋於事君親之道兩失焉。雖王事靡盬之辭，朝廷優容之當代名卿士大夫亦曲諒之拊膺嗚嗚其欲援此以自解，馬得乎雲所以噉然痛哭而與朱子綵有同悲也。吾母之喪也，雲在黔中，綵之喪母也，官京朝，其

悲同其情同耳今綵踏門來請為母銘墓下之石古之
孝子事朋友之母猶已母愛且因銘綵母以追痛吾母
矣按狀太恭人李氏魚丘方雅族父其芳文學幼習內
則詩禮通明叔明甲戌進士吏部郎其茂稱之年十七
歸贈中憲大夫華蔭先生先生負命世才魁壘瓌竒精
強開濟平生讀書慕晏嬰范蠡之為人自許為有用之
學交納賢豪酒醴槃勺左顧而歎應手立辦皆太恭人
有以助之鮑宣賢妻龐公嘉耦無以過也明末全城之

役魚丘紳士罹於法先生飽經患難越三載事乃白未
幾鞠疚疊告播遷者再太恭人事舅姑以孝聞自是持
家政五十餘年冠婚祠葬一準於禮中外雍肅儉勝蹠
縮奉法若有司郡朝無敢陝輸嘻鳴者以相宗子之賢
為賢宗婦最嗟乎當倉卒紛紜之日先生幾中危機太
恭人以巾幗擋拄其間室廬幸存椿萱無恙蓋已難矣
矧乎儻舍金陵買田澱水與夫奔走薊門杜林載稚子
於鹿車伯仁奉老母而南渡以它人處此不更難乎而

太恭人保嗇調護委曲周詳此其所以早嫺婦道晚樹
母儀魚軒重錦烏頭黃封以有今日也雲門徽蔭兩先
生於太恭人嫂也一避寇草澤餓餒必供一弱冠肄業
庖醪無闕先生友于之愛太恭人實與有成焉世風而
日下矣手足娣姒之間勃僉生嗛恩禮易替角弓之刺
詩人傷之太恭人為此所以挽頽俗篤天倫也而豈區
區小節哉噫世有如韓愈王珪其人者乎吾聞兩先生
事嫂唯謹事必咨而後行亦可謂無媿於古人矣太恭

人三子以紱出為勲愍公後夫命也以緯出為文學君
後則太恭人意也文學君早逝妻劉氏苦節太恭人毅
然行之割愛以存若教之祀立嗣以全黃鵠之貞非識
大體明大義其誰能之先生自遠歸聞而色動歎為鬚
眉所不及戚舊寒微自故里重趼來者太恭人下氣怡
色周給必至既勤且儉衣麤食糲不以珩璜禕翟易其
素常以先世忠厚淳謹訓諸子曰吾願汝曹如萬石君
家不願如王謝也綵官西曹調光祿辦嚴北發牽車請

留太恭人正色曰吾筋力尚健汝今往方判薦延客之不暇何留為綵之膺一命以娛親志職此故也嗚呼太恭人生前己未十月十六日戌時卒康熙壬申十二月十八日戌時年七十四子三人女一人孫一人孫女四人曾孫二人以某年月日祔葬於歷城縣之新壟禮也雯曰先王風勵天下於名卿士大夫母之賢者必載之史劉中壘所以作傳也故世祿之家所關尤重庭以內有聖善遠近奉為家法采風者非若於閭巷刺草之民

錄齏鹽之一行已也吾鄉濟以西魚丘朱為巨姓閥閱科名之盛文章爵位之美人稱之如周之推尹吉漢之重楊袁焉而太恭人之賢如此海內之論母儀端風教者必歸之焉可不列之國史與崔盧世牒鍾郝禮法並垂天下後世耶是不可以無銘也雖然舉魚之泣陟屺之悲雲與綵同也吾母之安窀塋已踰年樹靜風停碑豐松老讀蓼莪之詩而哭讀四牡之詩而更哭蓋有感於不遑將母之情抱憾於沒齒已矣今日泚筆以銘太

恭人之墓不自知其潛然承映傷心而盡痛也銘曰

江漢之廣兮來岷嶓崑崙之墟兮黃河之源蘭猗猗兮
滋其根桐孫長兮竹實繁山巖薛兮霜楓丹青鸞馭兮
白雲還馬鬣隆隆兮石盤盤五粒偃蓋兮勿劓劓而九
丸安如千年兮銘辭不可刊

誥封夫人王母葛太君墓銘

吏部左侍郎海豐王公水壺先生繼配葛夫人既卒之
明年將葬有期其子爾梅若梓以赫蹏來京師丐銘窆

首之石余固冰壺先生門下士也詎可以辭按夫人姓葛氏德平庠生元裕女明嘉靖中有官左都御史諱守禮諡端肅者元裕其曾孫云夫人幼嫺詩禮及笄歸先生為繼室自先生成進士入翰林歷官官坊學士刑部右侍郎晉吏部左侍郎門以內夫人力也事舅姑以孝謹聞凡門從姻黨阿保謙勝遇之皆有禮法魚軒重錦烏頭綽楔既貴盛矣而荆布如故寧儉無華其大者尤在恩勤二子馬二子前齋夫人子甫離襁褓夫人子之

冠婚成立以洎失怙之後依慈母膝四十年如屬毛離
裏堂上堂下勃谿鮮聞二子亦事母唯謹蓋夫人之賢
如此昔王汝南湛求婚郝普女令姿淑德生東海遂為
王氏母儀又京陵公王渾之子濟以中書郎俊才負盛
名史稱其母鍾夫人琰賢明有法度不恃貴陵人歷觀
載籍所稱無踰王氏者若夫人則出於端肅公之裔其
賢過鍾郝實甚夫端肅公以世廟名臣忠亮公直垂百
餘年流風未墜其詩禮家法迄今齊魯之士尚有稱述

之者嗟乎家學可傳弓裘非遠子若孫宜多聞人而獨
見之女宗巾幗之間亦可慨也冰壺先生謝世二十三
年矣今日濡筆以從追思先生之典型風采烏能已於
悲哉銘曰

山拔地柏叅天牛眠下馬谷前奠幽宮福綿綿鏗文辭
片石傳

誥封太宜人張母霍太君墓誌銘

衛河之水來自蘇門河之西為古廣川郡弓高之鄉昔

名修市

蔘條同

棗林之野下連棘津其地清淑曠美古之

名族踵相接也張母霍太君則又觀州之裔觀州屬弓

高分邑衛水之下流延袤芊眠委津渤海漢河間獻王

詩書之澤存焉董仲舒而後北魏之邢子才唐之孔穎

達諸賢故里映帶左右歷千百年清淑之氣所鍾名流

賢媛指數屢矣而霍太君最著余丙子春奉命祭告淮

濱路經赭陽霍太君之子張君羽紱為州刺史長跽而

前曰小人有母賢母也母之賢願藉公之文章以傳無

何母亡羽紱來都門又涕泣而前曰鄉者請公之文章也無已其為母銘墓門之石乎余何以辭今夫羽紱之言曰母大司馬霍公維華女中壘之篇大家之誠幼讀書習內則也年十七歸先孝廉公先大母喜甚廟見有儀也同卿英譽銓曹令名相夫子黽勉有成也育前子豐於所生庭以內無勃谿語慈而有禮也憫涿之妄人贖族之鬻子識大義也羽紱之言如此嗟乎世風而日下矣世祿之家罔知禮讓素封之子唯辨麥菽甚至有

擁千鍾之粟收龍斷之利帚屐徵逐鼓舌如簧以訟鬪
漁財為計以刻薄寡恩為能者比比矣而況巾幗之中
具勤儉長厚之德如霍太君者乎是可以銘矣銘曰
母也慈母也師毀吾謫詞磨豐碑如是母其又奚悲

李孺人墓誌銘

孺人于氏山西代州文學于公斯發女大學士謚文襄
李公之副室別駕李宜麟母也生於順治辛卯四月十
五日未時卒於康熙丙辰五月二十五日戌時享年二

十有六聿考孺人侍文襄者十三年癸丑文襄受

命總制兩浙孺人隨馬丙辰文襄移軍鎮衢立平寇功
孺人留杭署嬰疾卒甲戌秋渴葬州城之東其子宜麟
痛馬鬣之未封也用相冢者言卜於城南朱家村之豐
阡丐余文辭而樹之碑余惟夫有爵而婦則從子既官
而母以貴六義觀德南風有夫人之詩八卦成形東方
分少女之位坤道之賢無論嫡庶也孺人勤而有禮受
教於公宮和以成仁有聞於師氏系出方雅之族職居

蘋繁之亞雖沒踰數年堂以下僉從媵婢迄今稱道之
不哀可謂賢矣子宜麟善承父訓追悼母儀樹靜風鳴
嗟黃口之失恃金銷石泐復負土以銜悲是以改葬於
茲原也山形起伏允符白鶴之祥地勢風烟乃合青烏
之氣調曰

無棣之鄉兮泉甘而土肥鬱鬱瀧岡兮白雲飛尾畢逋
兮鶴其來歸夫人之城兮松楸十圍若斧若堂兮廳靈
旗朱輪玉珮兮神依依子孫鼎盛兮報春暉

李文襄公墓碑

凡忠臣之道有二端焉為其易者裂膽墮肝有死無二
為其難者開疆復土為國建功是以下氏效忠不辨武
庫之績尸鄉表節何如麟閣之圖若夫澤被生靈勲蓋
天下樹銅表跡刻石紀功我朝以來惟文襄公斯為烈
矣癸丑之歲一杯釋權三方邁亂滇為禍始閩造釁端
非闕家令吳楚削地之章不學陳平雲夢為遊之計驪
山英布本自黥徒南越尉佗翻思帝制朝廷蕃屏是寄

匪賢勿居范瀋陽公總制八閩李武定公總制三浙東
南委任僉曰得人逆賊耿氏反易天綱斷茲地軸星精
亂動海水羣飛脣齒之間志殲於越鋒鏑之下氣奪句
吳瀋陽公餌雪餐苦節旄盡落關河嚴隔首尾十載頭
會箕歛家家自謂供軍握璽探符人人志輕當璧公命
世應期匡時作宰高崖千丈澄波萬頃運山海於襟期
擊吳越于懷抱身先則闔境胥安交綏則萬人待命慷
慨歆辭丹誠貫日意氣吐而風雲升嘯叱生而江河止

使悲思之嶺絕勝秦關荔枝之園終還夏物伏歿鼓血
上徹於天揚麾從公聲振于野江山同官渡之丘太末
盛昆陽之戰既自天南不競有北方投屬國將還江淮
欲徙方當走餘善之頭顱歸馬公於同日不謂逢螿蠆猶
毒豺牙競噬纒囚釁社原野脂膏嗚呼子能死之我必
能復之忠孝之節臣子之分圖其大者何其難焉惟公
一舉而返章安再戰而達歐冶砮轟震地如烈火之遇
鴻毛硯磔隱天若激水之投巖石衡琯戈而見使者執

金鼓而問賊臣俄而谷靜山空水消霧散雖陳寶應之
懸首建業王審知之納版洛陽以今方之曾何足喻自
出擁干旄入叅衡鏡三公絕席七十懸車神仙之術未
守庚申天道周星窮于甲戌公薨春秋七十有三

天子坐雲臺而念舊臣聞鼓擊而思將帥有詔褒哀為
之不舉嗚呼以今康熙三十六年丁丑賜葬東原胡夫
人祔焉禮也謹按公姓李氏諱之芳號鄴園山東武定
州人自丁亥成進士凡蒞浙者四以中丞之職讞獄而

著清聲以行臺之任麾兵而保重障累部曹歷御史登
尚書位宰相處人倫之要職據操撮之雄管並皆直詞
抗節垂露難書鴻名偉功懸針不盡與夫先世簪纓子
姓銓叙平生高行夙昔善言公本傳年譜墓志已悉書
之此則並所略焉何則譬言猶洪鐘萬鈞不計錚錚之積
響崑崙九派寧數涓涓之長流余所以標其大端永垂
貞石云爾

奉政大夫陶菴李公墓誌銘

李公諱泱字孔皆號霖瞻先世江西寧都衛人遠祖牛
仔以總旗官戍德州衛遂家焉數傳祖清習農事六世
祖逢時嘉靖間進士官御史山西布政使高祖汝棟舉
人曾祖煥太學生祖嗣美以子貴贈大夫父允楨舉人
歷官廣西左江道僉事公其長子順治首科乙酉舉於
鄉明年丙戌登傳以漸榜進士除直隸延慶知州調楚
茶陵旋謫山西芮城知縣值寇變解組以歸以子元璫
官授奉政大夫工部屯田員外郎卒年八十著有陶菴

集四卷年譜一卷年譜中自述生平事蹟詳而有體復
文辭可觀余故為序之今復誌其墓公稱南李王祥佩
刀世為卿族鮑永驄馬家傳司隸公之本源遠矣年踰
二十以文章著名蘭臺石室是所洽聞白馬飛狐彌高
詞氣與北李星來先生美同雙壁譽動一時策名並驅
不啻機雲之入洛軾轍之出蜀也其仕也兩地牧伯三
載邑良鄆攸清白見稱五羖之歌劉寵廉能名為一錢
之郡無何狂寇西來孤城莫守既墮包胥之淚覆楚復

全遂作彭澤之吟挂冠竟去於是相羊泉石殆五十年
縱橫典墳幾數千卷雖無辟疆之名園羊曇之別墅而
一丘一壑一觴一詠自謂過之晚號陶菴明志也雅善
作詩格如白陸體涵韋柳漁洋評之海內才士誦之方
之圭壁塗山之會萬重譬彼雲霞赤城之巖千丈其作
年譜也時年七十有九最其大致好客則樽中座上似
孔北海托興則名山屐跡似宗少文撰生志似杜牧之
營生壙似司空表聖為自祭文仍似靖節先生可謂達

人高致矣况公性德冲和資神淵粹馬少游之居鄉曲
果為善人陳太丘之多令聞實有盛德古所云守柱下
之和光得北叟之晚福者非耶尤其異者嗟交道之衰
久矣夙昔以管鮑相期迨生死殊途涼燠驟易甚至勢
利譁張下同駟僧市兒之行孝標之歎無聞叔教之貧
誰惜公力挽頽俗獨全大雅聞公之風者其亦少愧矣
乎余所以于公之沒而潛然出涕也公之葬有日矣山
陽車馬望別寒原潁川賓客遙悲松路元璿來京師丐

銘余故為銘子皮之死于產哀之有道之碑中即奚愧
其生卒年月子孫姻婭同里蕭侍讀書於行狀之紙尾
例不更書銘曰

長河之里兮代有哲人嗟嗟李公兮古道猶存余是以
作諷辭鋟豐碣於公之羨門

貴州鎮遠府知府又何李公墓誌銘

長山李公緩齋以需次補官卒于京邸其子斯祜重蔭
而來將輿櫬以歸介通政靜菴先生為請而屬余銘其

墓按公李姓諱子之字又何號緩齋世為長山人數傳
至高祖槐軒公曾祖芳洲公祖見山公俱以司寇公貴
贈光祿大夫公父

秩

官常德通判 贈戶部主事生

六子公第四子也少時穎異讀書日十行下初為制藝
語輒驚人司寇公獎賞為加冠巾年十四入黌序明年
受知于學使宣城施愚山先生以高等食餼偕諸生進
謁施公命巨觥酌諸生酒公一飲輒盡舉觥請再酌施
公大奇之己酉舉於鄉登庚戌榜進士時大母一品百

齡奉

旨建坊聞捷音喜曰吾家世受

國恩不圖百歲人又見幼孫登巍科也丁巳授內閣中書舍人戊午丁外艱服闋補原官丁卯遷戶部山西司主事晉浙江司員外郎淮上之役

上諭九卿保舉賢能京江相國張公時為大司馬首薦之己巳遷工部虞衡司郎中秩滿擢江南淮徐道僉事河臣保題有人赴部改補得貴州鎮遠府知府三年役

息賦簡民苗以安商旅樂出于途上官薦卓異第一丁
內艱服闋來都下己卯七月十二日未時以痢卒距生
於甲申正月初一日寅時享年五十有六元配恭人馬
氏子一人斯袞邑庠生女二人嗚呼公系誕隴右代重
龍門貴族華望猗歟盛矣况器宇詳整風情雅潤綺年
而播令譽韶歲而有俊名孝性自然仁心獨秀雖桓麟
十四荅宿客之詩魯連十二杜堅離之辨莫及也其飲
愚山之酒也個儻不羈旁若無人又不啻元龍之豪氣

叔度之風流矣迨夫登第之日正大母百齡一品之時
大母坐堂上子若孫雁序立於兩階賓從姻婭輻輳接
跡凡王謝之衣冠崔盧之子弟咸舂鞞鞠脆而上壽魚
軒重錦瑯儿文裊爵行樂作絲竹迭奏門外車馬喧闐
公以天人之姿捧紅綾之餅被綠汁之衣升堂而造諸
膝大母喜可知也一時里人傳為瑞事公之守鎮遠也
相如西諭鏤石于靈山武侯南征浮船於瀘水不是過
矣其地上連三楚下通六詔潏水之曲九股之苗號稱

難治公報最三年卓異上考印笮畏其威狎獠感其廉
太尉楊震直推故吏之金涼州張奐高揖羌人之馬公
何讓馬余撫黔之日二千石庸材耳每興世無龔黃之
歎詎意予去黔之後而公來未及目公之五馬政績也
無何需次京華怪驚鵬鳥寂沈旅舍鬼生夜燐高臺已
傾稷下有聞琴之泣壯士一去燕南作擊筑之悲人之
云亡潛馬出涕風流頓盡我懷如何矣故為志其墓門
之片石而系以辭曰

山之陽於陵原石瑟瑟水沄沄一鶴歸羽高騫凌星辰
手可捫松既老花亦繁七尺墳如巾軒天風吹搖幢幡
碑顛屬永以存毀茲石告子孫

日講官起居注兼翰林院檢討學山顏公墓誌

銘

康熙戊寅^缺月二十有二日 日講官起居注兼翰林
院檢討顏公卒公諱光數字學山曲阜人其先世復聖
之裔之推而下數十傳迄公曾祖嗣化多隱德祖胤紹

河間太守父伯璟敦詩說禮以家訓淑其子弟聲著齊魯間公少負異才措志墳籍以戊辰進士官翰林壬申會講官闕員

上遴文學最優者掌院臣以公名進

召問者再授日講起居注兼翰林院檢討癸酉典浙江鄉試復得人稱

旨

上嘉其廉明旋命提調浙江學政甫報竣疾作還

朝浹旬亟上章乞歸卒於家卒之久語家人曰重膺

異數莫答涓埃所云未效風霜勁空慚雨露私也公夙
昭士譽蚤冠藝林道文麗藻方駕曹王英特俊邁聯橫
鮑謝世之競言文章者闕其戶牖聆其謦欬若升闕里
之堂登龍門之阪矣以故兩操月旦疊聽越吟水鏡歎
其空明四知凜其介氣使顧盼者倍價剪拂者長鳴浙
之人士社祀庚桑家奉朱邑俗有為蜉蝣之撼作蕙苾
之疑者知音既稀真賞殆絕於公奚損焉公靈姿妙悟

尤精琴理嘗曰琴之失傳久矣今之鼓琴何殊箏笛吾
數年後當別有譜夔曠接響頗有餘慚孔翠羣翔豈不
多愧嗚乎公亦竒矣公至孝官翰林時迎養母於京邸
僦居陋巷竭事甘毳友人贈言曰每向高堂憂菽水何
嘗太史不簞瓢傷公之貧也今貌爾諸孤葛衣負薪家
徒立壁則公之廉可知矣昔人云如此人曾不得四十
豈仁者不壽自公好學之祖已然歟如學山者復何愛
吾犀麈尾耶公之兄曰淡園修來兩先生淡園以翰林

今方為河東鯀使修來吏部即拱木已積風流頓盡余
追憶少壯時與淡園修來交公方作竹馬嬉耳歷幾何
年溘焉朝露玉樓有召遽赴夜臺文通多才偏奪古錦
從修來於地下弟勸兄酬吟魂不孤矣嗟乎龍蛇之歲
已傷修來山河云邈後悼學山匠石廢斤于郢人牙生
輟弦于鍾子曰經黃公酒壚不得與阮嵇同飲寧不悲
哉公配孔氏封孺人三子肇亮肇亭肇壘三女缺年缺
月缺日葬於缺之原銘曰

顏氏之子才孤標兄弟羅立如斗杓季方挺拔真詞豪
文章卓犖較莊騷程才擁傳馬蕭蕭狔鼉風雨錢塘潮
成蹊桃李一握笑叶諸生排列求其曹上下仙的與神
囂叶如旦饑心神勞鳳哀雉噫山之幽叶齟齬齧鬼
相招引歸天上遊逍遙風檣陣馬生狂飈遺文墜翰枿
花多叶漫愁石泐防金銷凸墳四尺眠林丘叶服鳥半
夜鳴啾啾叶落日沒鷗天宇高松髯蕨藪垂林皋謫辭
鉞石涕泗交過其下者心鬱陶

中憲大夫陝西神木道按察使司副使陳公覺

菴墓誌銘

公陳氏諱洪諫字憲宸號覺菴德州人也溯受姓之源
系本姚嬀自敬仲以後氏別陳田太丘盛德流為家風
元龍清襟不乏豪氣祖缺處士父缺贈如公官公

儀表外朗風神內照未逾齠齔已誦讀百氏書方在蓬
茅好議論天下事室無儋石之儲意作冥鴻之慕陳孺
子分肉而歸唯啖糠粃劉穆之江家一飽便索賓即傷

哉貧也莊周車轍實有涸魚信陵鞭前元非窮鳥嵇康
鍛竈既煨而堪眠管寧藜床雖穿而可坐誰能識公之
素志哉迨入庠食餼登順治戊子科賢書含吐性靈抑
揚才氣勾稽八股落落詞高麾灑千言颺飄意遠鑄金
之術不學王陽章臺之遊幾同張敞杜牧之薄倖揚州
司馬相如滌器臨卣終莫掩其才華何嘗鍛其毛羽嗚
呼竒矣己亥科成進士辛丑任四川合江令峽路五尺
緬約纜通縣水三門橋飛齊渡公乃芟荆榛創城社民

襁子而來虎俾耳而去佩犢帶牛有侔龔遂桑枝麥穗
無謝張堪乙巳調雲南臨江府推官訪金馬碧鷄之神
入怪雨盲風之地典斯獄獄職佐士師犴戶苔生圜闕
籥動載酒屬車幸無冤氣慮囚軍府或聽鳴琴裁缺回
籍戊申補授興化令當斯際也河伯不仁陽侯肆虐竈
烟皆水民命其魚公請蠲請賑牒凡數十上繪圖以陳
無愧監門使者嚙指呼救可憐南八男兒今邑人俎豆
之不哀辛亥遷江西袁州府同知旋擢撫州太守正值

寇變屢建奇績恢復六邑招徠萬戶公示人赤心與人
顏色盜不敢發民不忍欺楚城鄰境實有讓田吳人對
營無妨贈藥而且贖妻鬻兒勸農課士在在美政不可
僂述公之經濟弘矣公之惠澤深矣杜鎮南之作牧當
世樹碑黃潁川之居官生年刻石公何讓焉庚申遷陝
西神木道副使秦中山黑關上泥青露冕觀風停車待
雨百城解印憚朱穆之威嚴千里相迎愛王基之德化
居陝三歲癸亥致仕乞歸眷眷吏民不無河內之請依

依父老實念黎陽之別公還里之日年七十矣鄉里稱
為善人自署銜曰髮衲或棲心禪悅翻貝葉而披袈裟
或散屐林泉曳紅藤而親魚鳥如是者十餘年康熙己
卯缺月卒享年八十有六公志氣縱橫風情倜儻平生
好聲伎弄絲竹嘗以語人曰崔駟以不樂損年吳質以
多愁嬰疾若使詳其音律是所邈然但能記其鏗鏘於
茲為幸不然無地埋憂有天皆醉吾何惜焉引商刻羽
蕭琛移情換契換頭周郎顧曲故由壯至老日以家樂

自隨良有以也與先大夫為布衣交誼均縞紵契比金
蘭五月披裘見尋三春負鋤相識洎乎出處易跡生死
殊途五十年間小子有深悲矣今卜於缺年缺月缺日
葬於衛河之西阡嗟乎伯道無兒若教有鬼嵇叔夜之
山庭尚多楊柳王子猷之舊徑空餘竹林銘旌墓碣書
神木道副使官爵禮也嗣子缺丐余文而痛之墳前之
樹染淚先枯庭際之禽聞哀斯下元配王氏繼配曲氏
皆以公官贈封如例銘曰

長河之澣斜陽懸老柏鐵榦生寒烟中有陳公之墓田
內蛇外蛇傷不全新鬼故鬼家其間狐狸晝語鷓鴣夜眠
過其下者聞哀猿乍疑搗箏弄管絃再一聽之涕泗漣
六龜四綬公生前白衣蒼狗八十年四周板上草連天
泰山鴻毛落言詮彭殤一理吾悲焉橐餘沽酒青銅錢
一滴何曾到九泉豐碑二丈高丘巔旁有流水聲潺湲
我作謫辭慚如椽聊代楚些招魂篇吁嗟陳公後世傳
中大夫福建提刑按察使司按察使清止趙公

墓碑

公諱進美字韞退號清止青州益都縣人也裔本天水
山有竜坻麥厓家住孝鄉地是夾谷壺口蓋基源遠矣
祖龍溪公贈中大夫父暨垣公明天啟乙丑進士監察
御史累官陝西叅政王祥佩刀世為卿族鮑永驄馬人
稱司隸公含章天挺命世誕生蘭臺石室是所洽聞鳳
嶺鷓峯彌高詞氣年十七中崇禎丙子解元又四年庚
辰成進士萃海岱之英靈策名第一擅鄒魯之文學偕

計無雙駒齒未落委席帽于槐花觸佩方離沆褐衣於
柳汁王寧朔不使鄧禹笑人荀中郎蚤為殷浩延譽方
之於公曾何足比初授行人值甲申之變僑寓金陵徙
吳江順治乙酉

世祖章皇帝下

詔直省督撫薦舉地方人才

召授太常寺博士從容進退之機保此令德舒卷風雲
之際無妨貴仕公負文章盛名寓京師從遊日衆河汾

都講房魏皆其生徒東漢風流李郭無煩標榜庚寅以
才望擢刑科給事中癸巳遷戶科右給事中甲午轉禮
科左給事中典湖廣鄉試公之為諫官也立言必本經
術集事動闕典禮凡

北郊籍田祈穀諸疏悉奉

俞旨允行無何汲長孺之直出理淮揚陸敬輿之忠甚
深裴竇天下之士無不惜公之遇也丙申出為江西副
使分巡湖西道當是時江右新附吉安之永豐臨江之

新淦峽江贛之興國素稱盜藪公障彭蠡戍湖口行鳥
道奪俘獲降逸盜李毛禽叛將郭某疆圉底定厥功懋
焉巡撫張公朝璘蘇公弘祖交章薦于朝嗟乎公清癯
如不勝衣耳而轉戰麾兵胸甲百萬梅聖俞注孫武之
書張橫渠習尉繚之學非但童子明經書生說卦也庚
子轉廣東叅政分守缺道尋裁缺里居養親者五年
乙巳起補關西公父母年八十考終喪禮闈補江南江
鎮改浙杭巖丁巳分守河北戊午

詔舉博學鴻儒徵詣

闕公恥與後進爭名卒報罷壬戌擢福建提刑按察使
甲子引年致政歸城東有秋谷川巖竒勝公治亭圃嘯
咏其間八年張衡渾儀之後即賦歸田杜預沉碑以來
遂停鄉里陶穴為鄰無非桑柘瓦甍茅齋長物蕭然酒
劑琴材以康熙三十一年十二月初五日卒年七十有
三子一作謀國子監典簿孫一執遂官監生已卯九月
二十四日葬於虎山之西麓竹徑陂陀但聞夜雨松聲

蕭瑟長起秋風墓門之石題

皇清中大夫福建提刑按察司按察使清止趙公禮也
嗚呼公儀表外明風神內照早通二氏之學靜默寡言
戊午余同應

召試得識公於鐵鶴巷余侍坐受教嘗聞公之論詩也
曰詩之合者於宋得嚴滄浪明得徐昌穀王元美昌穀
深造然所自為不媿其言者十可五六焉若元美可三
四耳夫格律嚴則境地狹擬議盛則性情薄作者病之

至於放意背馳侏儒嘈濫以棘悔為超詣以疎佻為亮
節又下不足道矣或者唯黃異調訕諫先招是未履門
閩而歷數曲室之藏也陶謝不必為潘陸李杜不必為
王駱君子泯其同而慎其異斯可矣公之論詩如此公
著有清止閣集行於世詩凡如千卷入燕一卷眺碣石
而遭回驚客心於鴻爪渡桑乾而怊悵寄愁思於梨花
張華宅畔絮劈寒雲郭隗臺前途荒春草莫不流連馮
吊盡入篇章南征一卷大江南北山川助其勞歌浙水

東西舟車無非美製六朝往事體麗齊梁一水中流岸
分吳越公之詩境一變遊晉一卷餐晨露於姑射虹掛
峯腰問野渡於滹沱日殘鴉背馬陵關冷處處黃塵韓
信祠空年年白雁殆又心情悲壯詩律高蒼矣遊秦一
卷塞外山黑關上泥青鳳翔之觀凡八陳跡猶存褒斜
之谷有二皇華靡及昔杜拾遺白太傅各有秦中諸篇
公實勝之白鷺草又一變秋澄彭蠡大小雙姑春瀑匡
廬低昂五老留使君之車騎多佳日之溯洄而乃自關

揭調別有精思前此矜王孟一格於茲凌鮑謝而上粵
東草一卷浮丘峯下蜚人興珠母之謠陸賈城邊黎女
織春鐙之句遊楚一卷吹鐵笛於長江呼周卽於赤嶼
庾公出鎮遜此清吟蘇氏寓黃方斯逸響豫章草一卷
入忘憂之館月滿梁園過章華之宮風生漳水訪蘇門
之高士遇吹臺之酒人無不煜爍雲霞鏗鏘金石風人
之目詩家稱五字韋卽騷體之遺作者有七發枚叔况
夫分其餘技更倚新聲香熏側理出入於草堂花間艷

摘喻麋臣僕乎金荃蘭畹具秦黃之婉麗兼姜史之風
流而且春風紅豆撰成輒付龜年曉月青衫歌罷笑過
柳七凡飲井革盡識名垂樂府若逢寒火可知壁畫旗
亭斯又抑揚才氣詼蕩詞場者也余表公之墓而系以
辭曰

二百年來淪寂無作者邊李而後今見一先生濟南已
矣涕淚嘆逝水誰其壁壘巔巔如長城公騎斑狸命駕
白榆上袖中千百竒葩散青冥九天之雲倒垂四海立

神山綿邈閩風何泠泠才如萬仞峯頭掃嵐帚手如當
空掣電掉尾鯨竒如夏禹井鑠巫支恠捷如涿鹿陣毆
蚩尤兵學如千倉萬困擘歛富美如魯削妁竒般倅成
宋元碌碌餘子那足數漢魏堂堂妙句絕可驚江淹花
管入夢彙腕下李賀才鬼吟夜通精靈小子誦之書籤
紅間白其人沒兮詞鋒縱復橫寶瑟再鼓淨洗筑笛耳
俳體如仇我厭蒼蠅聲二女泉漲石馬不可渡八子砮
燄樵唱來相迎朝兮崑崙縣圃尻安在夕兮唯蛻連蜷

下玉清荷衣蕙帶逍遙容與兮公魂歸來晞髮採藥行
我持辦香杲杲上寒日九點東望未了齊山青

誥授通議大夫分巡山東濟寧道按察使司副

使佟公墓誌銘

公佟姓諱國聘字君莘三韓人也世居遼左奕葉相承
車騎連陰鐘鼎成列當代稱名閥者首佟氏蓋西周之
尹吉東漢之楊袁矣曾祖登榮祿大夫祖翔鳳通議大
夫父耄年丁亥貢生光祿寺卿王祥佩刀世為卿族鮑

永驄馬家傳司隸以此連類殆又過之公生於崇德七
年閏十一月二十日丑時儀表外明風神內照人莫不
羨洛下衣冠華陰子弟它日蔚為國器雍雍乎清廟之
朱絃明堂之蒼壁也以恩蔭授吏部筆帖式轉樞曹公
留連墳素怙惆文辭就經黌舍不取博士之名習武兵
欄仍負詩書之氣值更定品級考俸滿外用辛亥冬除
碭山令王武子之初仕正及華年荀中郎之冊勲才踰
弱冠而公精於吏職留心民瘼爬梳利弊劓發彈丸逋

賦一清枹鼓無警碭當黃河之衝公憂之鳴琴餘閒於
禹貢水經注溝洫河渠諸書披覽雕撿準今酌古日討
論淮黃全勢而槩括其大槩嘗以語人曰河之患非一
日矣得其人則理非其人則廢攷之曩代莫不如斯是
以江淮而南陳瑄績著濟充以北宋禮功高旁及徐有
貞劉大夏潘季馴輩非河漕之淵鏡乎昔王寧朔不欲
使鄧禹笑人余何辭馬前河院王公聞而賢之嗚呼公
治行本之詩書為有用之學按其生平大約膺民社之

日少親河務之日多課最入於歲成論功書之年表蓋
自碭令始云公之為碭令也二年擢歸仁堤同知三年
調宿桃又諸路監理未一年遷黔平遠守題留原任
十餘年塞楊家莊蕭家渡二決口建朱家堂溫家廟二
石壩濬白洋引河九道築黃河南岸遙縷月堤九千九
百餘丈北堤一萬五千餘丈浚中河一萬五千丈有奇
所至左提右挈櫛風沐雨石隼土塘鑄金捷木財不多
費役不後時前河院文襄新公倚辦如左右手剡章凡

十七上肩鉅幾三十年兩罹光祿公陳太夫人大故一
則在任守制一則倚廬而居哀痛滅性三日不食公之
孝也未幾題授分巡濟寧道按察使司副使舳艫千帆
淮沂其乂旌旗十道奄有龜蒙公之此授僉曰得人任
城為運漕孔道公迺恤淺夫之苦免張秋之租減臨清
之稅除駕木之費善政班班復以監督高堰工程移駐
袁浦又嘗語人曰天下大要害二曰河曰漕國家歲轉
漕數百萬銜尾魚麗而上率從漕河入漕通則河治又

高寶諸地不傷昏墊而後河漕之功以成今日之急務
黃之可以褰茨而下楫也淮之可以渠分而股引也高
堰之似浮山上格可以井榦立而兩鵠鳴也為百姓請
命余敢怠諸公志氣縱橫風情倜儻處天下事精敏有
大略出舍河壩躬臍胼胝泥塗舂牖歷有歲年功莫偉
焉而公勞且病矣卒於康熙三十八年五月初五日己
時享年五十有八沒之日淮土停舂魯人罷市巫祀井
塌花覆庚楚之祠南池月明碑墮羊公之淚今以辛巳

年十二月初九日歸葬於密雲塔子莊之阡嗚呼祭子
產之墓慈母有懷過楊震之廬大鳥斯下子女婚嫁載
行述中銘曰

秋菊黃兮霜楓丹吁嗟千年兮鶴來還神漢卻吐兮白
檀之山喬松偃蓋兮九九而盤盤藏茲石兮百禩其不
刊

太安人呂母李太君墓誌銘

古者葬有銘禮也儒者握寸管數行墨於文章珍重慳

惜如韋貫之拒裴均之銘是也矧巾幗遺事門以外莫
與見聞世不乏陶母之賢莊姜之行即以長沙人士稷
下書生為之作誄流傳猶恐失實如徒句章縫家言撫
拾浮辭君子以為非禮雖然漢劉中壘謂王政自內始
故列古女淑德以示天下後世則賢母之有關風教宜
銘也呂母李太安人既歿之明年將葬有期其子非虎
來京師長跼而前曰不孝為吾母納窆門之石不敢以
赫蹏請重趼千里覩縷號泣嗚呼斯謂之孝也已夫春

秋之紀卒葬也書母書夫人各就其赴告之辭以為詳略今子之述其母既以詳矣余文烏得而略諸太安人姓李氏李公觀光女年及笄於歸為贈承德郎亮公之配生三子長非虎癸卯舉人初任臨朐令歷戶部江西司主事次兆熊貢生次兆祥候選訓導以非虎官覃恩封孺人待贈太安人生於前萬曆四十七年四月二十三日丑時卒於康熙三十九年七月初六日寅時壽八十二姑之壽八十有二也太安人事姑孝姑期以享大

年與姑同言如左券異矣太安人以隴西之系右洪洞之族從來方雅名門詩禮所鍾無論冠裳之彥與夫閨閣之英蓋天之淑氣而邦之儀型太安人所以賢也况乎誦顏芝之孝經通班昭之女誡九日登高曾銘秋菊三元告始或頌春椒又餘事矣其助承德公也庄內政識大體機杼操作親灞岸之蠶桑黽勉有無勞扶風之井臼而且敬愛天情言容典禮箴管必飭有鍾郝之家風鉛澤不華薄崔盧之門地謹以事翁姑慈以御僕婢

篝燈宿火以訓諸郎裙布釵荆以勉諸婦營喪葬供祭
祀靡不中禮析箸之後分而復合生殖漸充儉從日繁
門以內無谿勃之聲堂以下鮮陝輸之態鄉黨遐邇莫
不矜式其家法當非虎之牽絲臨胸也買犢風行懷磚
俗變鄧攸清白見稱五鼓之歌劉寵廉能名為一錢之
郡太安人迎養官署誨爾諄諄河陽花滿壁上懸魚雷
池鶴飛盤中封鮓俾其子召杜聲譽籍甚於神爵五鳳
之間嗚呼賢矣洎行取入都需次旋里罹承德公大故

服闋補今官余忝貳司徒欽其人深沉廉幹倚辦如左
右手宋之問昔在度夫人稱一妙盧允言舊司邦計世
號十才陟珉璠以窺江漢之大覽崑崙之墟而知黃河
之遠溯其所從來實母教然矣今以^缺年^缺日祔葬於
承德公之阡烏頭綽楔馬鬣崇封禮也嗚呼岵岵之慕
方深蓼莪之章久廢香流彤管徵諸琬琰之詞家嗣徽
音聊釋風木之痛是宜銘銘曰

匡邑之野鶴城之宮雲垂下澤日掩高春屢屐崇丘堂

斧斯在宿鳥啁啾喬松偃蓋水漣山峙命服朱輪猗與
坤德令望令聞文辭焱攸曷卓國史千百世下母之懷
矣烟埋沓嶂霧失遙村黃絹碑表蒼石墓門

一品太夫人葉母李太君墓碑

初連之峯萬仞居延之野千里白草黃榆蒼檜赭霞望
之屢屨若斧坊森衛如戟門是為葉母太夫人之墓太
夫人李姓隴西裔也柱史之稱猶龍將軍之貢宛馬世
胄甲族峻德淑型蚤已明詩習禮名媛作則矣配驃騎

將軍振寰葉公琴瑟在堂輜駟是御履端作椒花之頌
廟見嫺宗婦之儀七德含章四星連曜子日芳令鎮守
寧夏總兵官都督僉事名將家聲儒生門地年猶小學
已為髮士所稱位在偏裨即以元戎自許於是勳高竹
冊恩錫彤弓書則五車可誦劍則千人莫敵滕王閣下
角吹楊柳之營賀蘭山前月滿芙蓉之幕皆受太夫人
之教以有成也太夫人之教如嚴師然或有規其已甚
者曰吾止是兒少姑息則驕驕則惰惰則無成於葉氏

奚賴入侍多不命坐又曰汝不患無威患立威太過尚其恤乃兵士勿忽一日御軍失當太夫人誚讓者再日芳跽堂下聽命慈顏和怡方起立是時余開府夜即日芳鎮兵濟水九股狎獍之部雨卷旌旗大田溪洞之間風鳴刁斗余聞而賢之故為之毀謗書播美譽也唐李景讓嘗怒牙將欲杖殺之軍且謀變母召景讓廷責曰爾方鎮撫方面而輕用刑一夫不寧豈特上負朝廷亦致百歲母銜羞泉下何面目見先大夫乎將鞭其背諸

將吏再拜請不許皆泣謝迺罷一軍遂定先後如一轍
焉嗚呼陶侃為八州督府由于母賢虞潭立金紫養堂
是其子孝以今媲美兼而有之太夫人於康熙三十九
年庚辰以七十壽卒日芳執紼葬母於其鄉葬之日素
車白馬伐鼓鳴鈺健卒負鞬矢路人來墜祭弓鞬箭房
刀戟旌旗分二隊魚軒重錦樽俎簫管各一部捧
寶命者在前歌薤露者居後嗚呼鹿馴鶴舞千祥顏母
之林石泐金銷百世桓姜之冢系以辭曰

伯俞七十斑斕衣僿僿珊珊堂上嬉不聞手搦大將旗
卸甲轅門母鞭之三軍環泣勾母慈我帥征蠻百戰危
我曹銜枚馬不嘶吁嗟乎人子無母鞭者誰母已沒兮
咄莫追身留完膚將奚為我作此辭空涕洟將軍聽之
淚垂垂高墳馬鬣酸風悲華表祭立倚久暉青鸞來下
是耶非碣磳白雲兮願貞顯曲旦碑

孝廉馮公墓表

孝廉馮公與先大人少同里閭同以順治辛卯登賢書

有子舍人廷樾與余少長相優恩若兄弟也公以康熙甲辰八月卒丙辰十月葬於曹村直廷樾以太夫人之喪子寧三載今茲歲在丙子三月十有六日乃卜合葬謹琢石紀德揭於新阡公諱沛字雲生其先魏氏有華侯之封長卿食馮城之采秦則上黨之守世為公卿漢則代相之裔與論將帥繼自即墨遷於德州故又為同里人也祖仲選公與父嘉禎公並以儒術有聲都講開黌諸生負帙他他藉藉動邑傾都公德水降靈岱宗表

異仲任逞一見之敏世叔誇五行之捷累試高等遂登鄉薦於是與先大人公車北上矣夫稱之劉向當為王佐之才對在漢庭不讓賢良之策方當排金門上玉堂使鈞天有竒麗之觀帝室覲非常之寶有志不遂致乃嘯傲烟霞寄情丘壑春秋四十有九而沒嗟哉公睥其目瞻其腹于思于思與伯兄狀貌無異故鄉人稱髯仲焉事馬太夫人至孝奉兄惟謹王延有扇席之勤季江尋共被之雅與人弘恕謙退不伐苟有不平則大聲雷

動虬鬚直視有姊氏家貧公攜二甥歸撫為己子姊婿
為馭僧所陷幾辱有司公乃奮髯抵几深入排解然弱
寡既出奸黨終銜既而案牘連年絡繹道路納寤子之
橐餽縛子猶之美錦事獲平反乃歸杜門其振窮周急
皆此類也公以文章經術為己任鳩集子弟羣從諸出
授周易孝經講河間顏芝所藏法南城鄭氏之學致使
王家諸子多渾濬浚沉謝氏之門盡封胡過未其為韓
康伯則不別舅甥其為魏陽元則成茲宅相捐館之日

值遭母喪哀毀滅性有僕陳印死之子為母沒僕為主
殉孝義之道一朝總集非公仁孝忠恕曷以有此先是
公嘗奉太夫人避地城西葺廬衛水之上公傲游其中
良朋萃止有宿酒數壺好友相過視陳書十篋又吾鄉
之釀有銀漿承露哲壁截昉或墨汁三升黔過純漆錯
水出自屠蘇銀鯉觸於罟網陳罇設醴酒酣耳熱效嵇
阮之狂歌兼韋房之詩酒有齊謳激楚之聲有魚龍曼
延之戲於是風流雅韻名播青齊矣夫徙居好時本無

使越之裝別館河陽不在牧荆之富食指既繁生計日
促臨終之日嘗戒子云吾心鄙貨殖程鄭孔卓之流雖
谷量牛馬不願爾曹學之即佞幸之家伊優上堂閃榆
見納皮鑽毛羽珠成咳吐士苟一失此足身名俱墮吾
死不願爾曹為之也以此而言見公之風範矣昔者庾
信誅茅在於宋玉舊宅國讓誠子必葬西門墓邊公生
居董相祠前死近東方墓側方之古人諸葛有云未及
髯之逸羣絕倫也元配周孺人繼配曹孺人年各二十

有九並皆端莊惠淑賢才之室霜露先侵再配郭孺人
享年六十有五撫育遺孤三十餘年備歷艱辛其高節
行義漁洋王公為墓碣已書之矣舍人廷槐蓋曹出也
遇

覃恩贈父母如例女一適趙廷諫早卒孫一炎公一經
世守安如鹿門之遺寢丘無餘貴甚江陵之樹且昔人
云廬於承明署於金馬皆明察之官賢於管庫之末者
也余所以叙其梗槩貽諸好事永為靈表云爾

謝公墓誌銘

公姓謝氏諱陞字紫宸號丹楓系出江西贛縣周申伯
之封命築城邑晉東山之墅代踵風流明洪武間十世
祖官小旗戍籍德州右衛水夾鬱孤原分章賁地連厭
次乃卜其隣當昔偕冠裳來者史噐之饗鬼非淫昏聰
明正直而壹立廟高真觀曰江東謝家之神身不滿六
尺鰲面赭衣有文在手曰衣比之實沈臺駘殆其亞與
大父暹父宴家牒詳矣世德曷然公珠角擅竒山庭表

德儀範清冷風格倜儻少恥章句之學疾里塾庸師猶
寇仇人無識其故者泊壯以任俠聞語世事則哆口張
眉遇節義則掀髯抵掌以魯朱家劇孟為不屑道如古
之李元禮張乖崖陳同甫輩公獨心慕其為人崇禎己
卯山東大比公知天下將亂言時務如晁賈以為如是
則治否必敗有司咋舌烏程方大猷知州事聞公名式
廬請見公辟之大猷贈詩有却笑當年宰武城澹臺尚
有公庭蹠之句間再請一見大奇之公痛陳民生利病

時政得失旁及陰陽躔次禮樂兵刑封建疆理諸說大
猷拜受教段干木之闔門塞竇不見諸侯王景略之捫
蝨長談總關治亂以此連類公之謂乎甲申季自成陷
京師置賊黨防禦使閻杰州牧吳徵文來德公流涕曰
主亡天下亂讐可復也與州人李嗣晟謀誅之李云當
告諸薦紳先生公曰薦紳先生難言之彼慮事熟句萬
全也狐疑敗矣公仗劍往衆踊其後遇盧御史世灌云
于思曷維其來公弗顧徵文坐聽事堂遙望于思走踰

半垣拔角脫距遂磔裂之併執杰誅焉衆目眩良久欲散歸公曰賊踞京師散將安往女張女弓女鼓女鼓帥衆而北所在收兵與江表連和殺賊雪恥嗚呼筑聲水咽士之一去不還島上峯青客之五百空死方之于公徒增欸惜會

世祖章皇帝入關乃上所收印綬而大猷來為巡撫都御史徵貢於鄉當國者欲官之不受歸公自此隱矣知州某徵文甥也誅徵文時匿僧舍免後成進士來知州

事思得公而甘心焉誣以私藏兵器叱曰女喜殺官乎
曰誅賊耳長者在前叱何為也徑拂袖出卒無以害公
治產如范蠡之治越管子之治齊家隆隆起渭南千畝
之竹却懼滿盈池陽二頃之田每思止足教子孫則本
之鄒魯曰福之種者讀書儉樸人否必豪侈不事詩書
者也公優遊里閭垂十年與年七十以上者十人結為
稀社黃髮危齒竹杖褐衣釃酒長吟之下各述隆萬間
一事以戒後人公之行誼庶幾石隱丈人之流乎嗟乎

丈夫遭世多故幹濟綦難欲以明大義仗大節鮮不泯
忍顧慮者當明懷愍之季土崩瓦解解雨怪風盲麥秀堪
悲黍離興嘆孫恩移斗柄於北陸盆子假漢宗於南服
一綫長河止衣帶水耳羊斟忽來殘民作牧思明煽焰
大勢燎原維桑與梓言之傷已公揭袂奮起倒戟長號
效博浪之砰擊倡魯人之鑿祭縱異程嬰之匿趙兒差
侔荀蜜之逆周子迨夫降旗一片早出石頭夔峽三軍
悉平蕭銑自是而

國家事定德土以安公誠天下之偉人也公澡身浴德
遊藝依仁汝南令望扶風長者平日不以一毫挫於人
亦不以豪氣陵世人多喜親之入其戶布被藜床桑杯
石鼎諸葛亮有彈琴之宅王仲宣有讀書之樓從容安
危之機保此令名舒卷風雲之際何須貴仕吁噫公之
歿數年矣前輩典型無復覩矣悠悠再數年有心世道
之士欲訪公之軼事州人亦罕有言之者余之文與銘
在讀之反覆盡傷弔北印而太息也壽

缺

葬於小

鍋市之祖阡鐘沈德水聲出風雲劍沒豐城氣存牛斗
銘曰

嗚呼九原不可作兮巫咸大招公竭來高冠岌岌長佩
陸離盱目皤腹而髣髴朝太乙以為侶兮夕雲中湘君
乎追陪嗟遊水之莫挽兮渺余小子一日而腸九迴泰
山農人寶拳石笑終南之阜宿兮河濱漁父掬勺水目
洞庭之波頽繫香山之九老兮思公之德又挺拔磊落
之雄才公盍駕赤虬辭天闈以好修姱節三澗三疊乎

齧齧塵塋之士而懼此劫灰闕逢泥灘之葑閔兮
獠獠
禱杙狼虓豺公掉臂大呼賈勇登陴兮橫戈躍馬而藉
踏公之往事小子竹馬之年所習聞兮老夫其髦矣猶
且悼周傷郢而迸哀徵柱下之遺編兮中心若抽以低
回行日車於虞淵兮奠樽筭之雲雷墳高於雉兮長河
之厓

誥封夫人先室馬氏墓銘

嗚呼夫人行略前有言矣一爾過隙永歸長夜痛未掃

地而祠之光霽翳然埋名古遠歲在涂月泉臺告期兒
輩勾余搦管磬折為文章以傳蒙齋烏足以言文章也
比于儕侶一不及人遊鴻夕吟孤鶴寒嘯追傷遑轍莫
已于言嗚呼陽谷邨之南原土赭不藥呀如齋如介丘
厘屣徒駭衆潏其夫人之北邨乎筮易之坤曰安貞吉
藏以窆石毀以銘辭昔人云雖陵埋海竭文章不死馬
鬣一封天垂三微之露雛笨千本佛開四照之花言之
龕陋夫人鑒焉謹銘

百里奚歌虞度長貧賤黔婁妻五噫聲春廡下千載傳
其人者古伉儷有遺風余夫婦磨蝎宮嗟夫人扶風冑
下嫁余彘箕帚五十年堂上歡以孝稱無間言余少日
閔凶邁貧鬼訶外蛇鬪豕人立鴟晝啼陰風黑委涂泥
嗟夫人揮涕淚晉飛蓬理中饋瑁璫場顛顛歸夫人賢
肯下機穉月白膏草綠楚黔地何僕僕嗟夫人前致辭
楊樸妻老頭皮厭次城燕山道歸去來子偕老翠微西
馬晉東大荒落雪戎戎夕景斜崦嵫短翻日車不復轉

雲一色天四垂築敦丘蒿里悲潘岳詩鐙下讀哭夫人
還自哭人間世壽幾何學長生理則那笠在背衣至骨
種胡麻空啾嘆磨豐碑駕文狸陽谷村颺霧旗夫人城
年月紀後子孫琴于此夫人生于丙子五月二十七日
申時卒于辛巳十一月初五日未時春秋六十有六初
遇

覃恩封孺人疊封宜人再封恭人疊封夫人子五人女
三人孫六人孫女四人曾孫二人曾孫女三人康熙四

十二年癸未十二月初十日酉時葬



古歡堂集卷三十二

欽定四庫全書

集部
古歡堂集卷三十三
三五

詳校官侍講學士臣法式善

助教臣常循覆勘

總校官庶吉士臣何思鈞

校對官中書臣石鴻勳

謄錄監生臣方汝觀

欽定四庫全書

古歡堂集卷三十三

戶部侍郎田雯撰

傳

盧南村公傳

盧世淮字德水一字紫房晚稱南村病叟涑水人明初徙德州左衛曾祖宗哲官翰林檢討累舉光祿卿祖茂父永錫太學生明啟禎之際文士侈譚子史之學標榜聲譽流為鈎黨公為人簡易佚蕩高自位置恥矜懣忤

以邀名當世讀書尚志馳騁百家為文章不屑雷同筆
墨飛動無餽釘僻怪之習尋登進士第除戶部主事未
幾省母歸復強起補禮部改監察御史領汎舟之役值
久旱河竭盜賊充斥公疏數十上犁中漕弊皆報可役
甫竣竟移疾去當是時國事日非東西交訐公俛仰興
懷如抱隱憂悲天憫人往往發之於詩遊於酒人日沉
飲自放而已甲申已後每摳衣循髮歌泣無聊掃除墓
地有沉淵荷鍤之意

本朝拜原官徵詣京師以病廢辭癸巳卒於家年六十
六公貌竒古身長七尺鬚數莖長尺餘土木形骸掀髯
雄辨舌本風生如枚生七發間出雅謔語人一與公涉
鼻間栩栩皆以為盧公愛已願為之死屏居尊水園中
杜亭畫扇齋匿峰菴涪軒十餘間茅屋耳堆書數千卷
塞破戶外几案排連筆研置數處蠟淚縱橫公脫帽舂
鞞立而讀之讀竟轉立它處再讀它書雜誦長吟戊夜
不休亟呼酒二奴子取瘿瓢貯醞酒大容十升舁以進

之公又手鱸飲微醉則假寐鼻息雷鳴少頃輒醒醒復
讀書如故奴子垂頭而睡弗問也合祀唐之子美宋之
五郎故以杜名亭公自謂於子美詩四十餘讀爾來却
掃益有餘力選摘分帙名為胥鈔子美別李八秘書云
乞米煩佳客鈔詩聽小胥余與子美操觚充胥史而已
校之隸人伐木信行修水筒張望補稻畦豎子摘蒼耳
宗文樹雞柵占數鵝鴨頗策微勲倘藉手以見子美想
裂餅給酒在所不靳又云子美詩如天降時雨山川出

雲木葉盡脫石氣自青第人之才識有偏全子美之詩
從奔走一世中轉寥寂耳五郎隱居十五年不出戶庭
桑下受風高人冷語公之合祀蓋因以自喻云飲酒不
論賢愚貴賤汎濫酗醬老兵可呼甕側可眠食豕如食
人以為輕世肆志非也五十後亦每病酒大率侘傺沉
塞之狀莫自擺落酒居十之半耳曾勺人作生志其詞
略云濯生平得志於酒一尊陶然百慮俱淡相期終此
身而不必名後世生老病死聽之而已性好書般弄涉

獵聊復自娛問以經濟恍墮雲霧進之窮理盡性益復茫然矣或有舉五柳先生所稱無懷葛天之民以相儼者逡巡未敢承也嗚呼公之晚號南村意可知矣靖節作自祭文公自作一棺古怨古歡留連三歎浸假以尻為輪以神為馬亦逍遙長往已耳昔揚子雲撫離騷而反之嘗怪屈原文過相如至不容作離騷投汨羅以沒悲其文讀之未嘗不流涕公之於靖節亦猶是也公至性過人億事屢中如甲申春日夫豈預知義旗西指蕩

滌羣克乎身托

熙朝與仲長子光瘖瘖相對以泉石病廢終公實幸矣
公之論詩也既得其解復神明其意嘗歷舉以語人曰
從唐代別起只以詩論不必立樂府名色又五柳先生
云清謠結心曲詩之佳者可曰清謠又王右丞自稱詞
客畫師山中人輞川之勝金谷平原遜其清遠絕慾養
花一味禪悅藝苑中僅見者又世多以韋柳配陶夫韋
與陶差近柳則從謝靈運來雜之以吳筠何遜其悟處

獨闢禪理子厚自云惜無協律者窈渺絃吾詩所得深
矣又論詩者長舌為斧斲破瑚璉君子有憂之又作詩
與論詩作畫與論畫總眎其胸次何如天下事求之胸
次足矣又明詩當以高青丘為大宗又作詩唯推襟送
抱望古遙集凡山川草木風雨寒暑龍蛇虎豹霹靂戰
鬪天吳紫鳳出沒變幻或登高送遠獨坐彈琴古月新
霜雪痕花影以至綠鬢白足絕塞空閨秋墳鬼唱可愕
可娛可憐可詫之事悉囊於詩而和之以天倪夙饒勝

具青鞵布襪興來獨往則純於詩矣公之論詩如此故公之為詩也徜徉自適抽繹吟情結撰入微達人禪理竒思硬語駢出橫陳不讀公詩幾不知古今之大天地之純大槩公詩有句無篇吾政恐公以篇幅見長耳間有摘頽放之句相訾替以為口實者夏后之璜不無徑寸之考固不傷其為天球宏璧也余選公詩合諸體不踰百篇直使天清木響水落石出未敢謂陶謝不枝梧風雅共推激也公之遺書余僅得離騷南華讀本腕跡

猶新余於齋中設位以俎豆公投弓而泣跽石而吟鍾
期滿志於高山成連移情於大海則余之願也夫公所
著有尊水園集又杜詩胥鈔讀杜微言鋟版行世卒之
日其子孝餘以公書千百本納之古朴長寬之棺中閩
人黃閣學景昉作公傳

論曰明二百七十餘年鄉之前民聲施當代者指數僂
矣洎明之末蓋有盧南村云其人學本董仲舒才似顏
清臣而開濟明豁包含宏大則東方曼倩滑稽之雄也

然此皆余鄉之前民也若夫以詩酒自汙而全其晚節
又當與晉阮籍陶潛齊名於千載之後后之君子讀其
書論其世為之房皇追賞能無遡懷穀水通夢柴桑也
歟

侯戶部公傳

侯公諱抒悰字爾謨號古渠河南襄城人始祖自晉遷
汴自汴遷襄城累傳至公父奠邦生二子公仲子也公
少負至性孝弟愿謹十二能文章比長湛深經術恥世

儒空疎之學順治戊子登賢書壬辰成進士故事進士
謁選人例得大令公曰吾學未成不可父母斯民子產
云學而後入政未聞以政學者也具疏以請遂改河南
府教授浴自兵燹後學校廢矣公至闢講堂日與生徒
發明二程之旨穿穴經史旁摭掌故以資吏事秩滿以
卓異第一遷濰縣知縣濰富饒稱劇邑公行次白浪河
顧左右曰吾為令當與此水同其清矣治濰五年人服
其廉時嚴匿逃之禁奸民多鉤黨以破人產公立置之

法大賈郭某陷於訟薦紳為之請者以十數公閉閣不與通及對簿事卒得白郭以千金餽公峻拒之同年某為萊州守移書徵責公佯為莫解復曰濫竽作吏曠職懷慙苟有可以報

朝廷愛百姓者教之敢不唯命守意沮思中傷公會巡撫特牘薦公擢戶部主事以去公之治濼也原本經術盖自河洛橫經皋比談道時已基之矣公質羸善疾入郎署轉劇踰年卒公幼嗜讀書明季寇躡中原重以饑

謹項鄧汝鄧之間千里無絃誦聲公擁書如故家貧躬耕挂書牛角上且耕且讀人笑其迂獨其師田公起龍竒之公成進士田與同榜云

論曰公幼孤受學於兄抒憚事之甚謹令灘日抒憚語公吾家世清白若以一錢歸吾不復東視若矣故公以廉介特聞兄之教也抒憚以學行為經師晚年居柏泉山著採山效曾十三願諸書學者稱為柏泉先生戶部公以循吏顯柏泉以文學傳戶門監者之後固多賢者

哉

新安程公牧菴傳

程公諱子謙字益仲號牧菴江南休寧人先世自晉太守元譚治新安多惠政賜田篁墩因家焉傳十三世謚忠壯公靈洗佐陳武帝有戰功子文季盡忠王室竝賜祠載諸祀典歷二十四世宋三三宣議公敦臨徙居率口程氏蓋代有聞人云再傳十四世世茂人稱濱陽先生儒林長德享年九十三十五世公父贈通議大夫峻

德侗儻不羣恥佔畢章句之學牽車服賈貨累巨萬子
三公仲子也少嗜讀書父誨之曰陶計家法吾何讓焉
士無過人之行而矯語仁義長貧賤亦足羞也木奴千
頭封李衡以萬戶窮鄉寡婦築懷清之高臺汝丈夫也
尚其識之列之仲尼之徒為子贛無為原憲矣公再拜
受教五十年貿遷淮泗潁亳間貨益以饒以是好行其
德沾勺郡邑修屯溪石梁以利涉隄率溪上流無水患
置學田立文萃社以給士之貧者自世俗之日下也矜

刻薄之習鮮長者之風外侈羈屐家鮮蓋藏一遇緩急
有無皆不足以相掄而任卹之道遂衰公有憂焉嗟乎
宗法不講久矣水木傷親親廢甚至五世而上子孫有
昧其祖禰之名者公讀行葦而情生感角弓而知懼故
復以敦本署社敦倫名堂五祖合祠俎豆奕奕以垂示
後人也又效摯虞之族姓昭穆記劉子元之家史纂明
譜牒尊祖收族之禮莫大乎是大槩公天性過人自五
齡失恃哀痛不輟及壯孝謹倍至砥礪名行被服儒雅

依然經學者宿治家如治國無殊管仲之相齊范蠡之
霸越而其德循循犖犖一躬行君子也康熙三十七年
六月六日卒於武林旅舍子岳官戶部員外郎

論曰東漢樊宏之父重善農稼好貨殖賑贍族黨恩加
鄉閭是以范史亟稱之昔楚頃襄王問陽陵君曰君子
之富何如對曰分地以用天道實廩以崇禮節親戚愛
之衆人善之若樊氏其庶幾君子之富乎程公之行軼
於樊氏子岳方為地官郎以政事顯五侯之貴盛後將

不減湖陽哉

趙別駕傳

趙別駕諱啟睿字思伯一字思聖先世陝之咸陽人始祖得榮洪武中從戎川南有戰功後授德州衛昭勇將軍世襲百戶數傳皆嫻武事至鏜始以文學稱孫繼鼎天啓壬戌進士累官戶部右侍郎公繼鼎子也少讀書嗜春秋左傳長慕阮籍之為人飲酒酣歌放達不羈雖貴官顯者語弗當輒白眼眦之人呼之曰狂或目曰癡

公盍然笑曰癡誠有之狂則未也昔謝鎮西著紫羅襦據方床在大市佛圖樓門上彈琵琶作大道曲非狂耶王湛向雄顧愷之之流癡黠半焉士惟俗不可醫耳痛飲讀離騷便稱名士余且媿矣以廢授順天府通判絕苞苴抑權倖三年以廉幹聞會當權稅公力辭京尹某為中貴徵鷹犬於僚吏公峻拒曰為人鷹犬吾未能京尹銜之思中傷公遽投劾歸卞士蔚之脫幘戴安道之不為王侯伶人公之謂歟歸臥林壑垂二十年戊辰五

月卒妻陳氏楊朴之賢妻梁鴻之嘉耦也子某孫善慶
官國子助教

論曰狂者聖人之所取若夫癡晉之賢士大夫多尚之
二者其不足為有道之詬病亦審矣南史何尚之問顏
延之曰誰得卿狂曰吾狂不可及又唐許學士見人輒
忘人譏其不聰曰卿自難記若遇何劉沈謝吾奚忘焉
由是觀之唯狂乃不狂癡能不癡大賢烏可測也別駕
狂且癡矣當其面折上官挂冠長往不為苟且媿鄙之

行彼不狂不癡者能之乎固有太過人者哉

李孺人傳

南北李為長河望族世盛簪組戶被詩書而於女德母
師前無聞焉聞之自孺人始晉京陵公王渾之子濟負
盛名於時史稱其母鍾夫人琰賢明有法度魯敬姜之
治內政也男女效績愆則有辟由孺人觀之特細節耳
孺人之子森棟樑英異多才不數封胡遏末述母之行
意誠有在無論他日載於史氏或者烏頭雙闕豐碑宰

木之間紀吾文辭以傳乎孺人王氏王夢卜女少讀孝經內則諸書女紅文繡多出意匠年十六歸河津公為繼室前朱孺人遺兒楨撫為已出逾年遘晉陽之亂姜瓖踞大同叛所至蹂躪郡邑河津公為死守計孺人提兒女間行千里途遇盜仰天嘆曰寧死吾與女無死楨兒也楨兒死弗祀矣乃置女道旁抱楨伏石窟中獲免抵家募健士夜奔河津甫入城內盜颺起河津公死戰破圍渡河效包胥泣請秦師城復以完寇平河津公罷

官歸絕意仕進築退菴詩酒自娛偕隱以老賓客至必
盛供張列樺炬文酒高會孺人咄嗟立辦垂四十年河
津公卒孺人課諸子成立皆以文章著聲譽今長河里
閉咸稱母教云

論曰詩秦風之作蓋言武矣其卒章曰言念君子載寢
載興厭厭良人秩秩德音豈軍旅之事女子得預聞乎
當孺人之縋城以出也盜塵障日間道取歸募數十人
為死士以十餘日下河津秣馬驛兵椎牛饗士後河津

公以請師樹平寇績孺人力也可不謂賢哉詩又云何
有何無黽勉求之釐爾女士從以孫子室家之常儀不
屑道矣

毛烈婦傳

烈婦毛氏浙江遂安人祥符令毛公際可女方生引襪
妻也幼涉書史明大節年十七歸襪時襪父方公象瑛
以翰林官京師遣子就昏於汴襪素善疾暑途撼頓疾
彌劇甫抵甥館結禱五日卒署後危樓出雲下砌以石

氏墜樓而下不死尋吞金又不死家人弗知也洎歸里
守伯姬之節者十年塋夫已絕粒十有九日而歿遂同
穴焉其婢前數日傾虎子肉爛如塊家人驚泣得無金
石腐腸邪死踰年有農家胡淘廁淤泥中得金物狀如
耳環者一如指環者一胡之女亦往各得少許母家贖
歸雖其鑿齒迴腸金寒玦離明璫隨珥者矢直如弦彊
環規月者屈曲如鈎然其半狀往往識之彷彿附珠傷
仁照見十竹萌削也初氏之未亡也毛公為錢塘戴烈

女作傳有吞金不死語氏在旁讀之微哂曰吞金亦死人乎毛公心動至是果以死殉其死狀頗類之所異者戴處女此多墮樓一事云

論曰昔比肩之墓合於吳趨連理之枝交於宋國未有分杯帳裏却扇牀前早病河魚孤飛海鳥隋高樓而弗死結斷腸以銷金絕粒雙旬埋魂九地昔梁高行之援鏡剝鼻魯陶嬰之作歌明心方之何足云乎余讀毛公吞金記云耳環竝置烈婦祠中指環分留母家嗣子想

大秦之珠綴名璫於耳後環榴之臺藏玉腕於鈎中慄慄稜稜長存生氣有不謝豹春歸棲樓頭而腦裂吟猿夜語感金傷而腸迴者哉

賀二傳

賀二清淵市人也以質絲為業黃鬚眇一目善歌彈曲項琵琶變徵音為新聲又能作獸言驢鳴獫吠與絲竹肉相和屈折愉懌莫不如意二行歌於市旁若無人詡詡自得矜其伎之工也而市之屠狗賣漿者咸譽二詩

書雅遊之士以其異竊哂之曰二虫妄人也或曰滑稽者流二怫然皆非所樂聞二曰古云傳注吐酒終日不已出口成章詞不窮竭客以我為滑稽殆謂是與優孟郭舍人之徒其事猥屑不足道淳于髡東方曼倩輩誠有道者又儼非其倫矣然謂我虫妄亦豈知我者哉夫我之伎日工也以斲輪為師以承蜩累丸為友瘁心力以為之且十餘年天下士操一伎以成名其不及我之工也正多矣客無哂我之獸言也左傳介葛盧來朝周

禮貉隸所掌獸言鼻祖也古不有善雞鳴者乎而世之
鼓雌黃之舌為佞口以媚人嫉人者反出獸言下客何
哂焉二語畢旁若無人詡詡自得如故因命之坐勞以
酒復撥檀槽四絃度新聲撫節鳴鳴客皆賞嘆感激夜
四鼓二去

王媪傳

王媪屯氏河上嫠婦也善事鬼能為鬼言有一鬼帕首
跣足青裋朱裳盱盱睢睢狀如侏儒主其室有年矣鬼

靈而猾黠不自言毆媪代之言以故村媪販夫以事來
咨者掃其門復升其堂藝香再擗俛伏於地以俟媪高
座若聽事然喉喘顛汗閉目迸涎沓沓騫騫恣口以對
甲吉乙凶甲疾不瘳乙則已言輒驗俄焉既醒不自知
其吟嚙也媪之室日以饒市井無賴兒亦多陰伺欲中
之者癸酉六月河水漲人患之請於媪媪復向聲作鬼
言曰陽侯波起濤襄四陸震盪漂流爰止烏屋三日歸
槽河伯牒復鏢彼巫支方山之麓媪嗚嗚不勝鬼言果

三日漲止人皆德之謂鬼之靈如是媪亦驕蹇自以為能乃病其媳之無能也以它事日詬許於庭媳恚憤夜出沉河中媪不知鬼亦不媪告也以其婦之死也無賴兒遂藉以破其家而媪之室空矣如罹昏墊而魚鼈爭飼也悲夫宋元王之龜能見夢而誣於自謀殆王媪之謂歟余竊怪鬼主其室既久而不為之防患於未然所謂靈者安在抑不義之甚者矣畢方黎丘之徒其不可與處也哉然則媪假鬼言以愚俗罔利適以自愚已耳

非真有鬼也

何媪傳

何媪者年八十餘矣身不滿三尺髮長二寸眉半之顏如渥赭人莫知其異也壬申冬為余執竈下役解后與之語詰曰不絮而衣寒乎曰寒也腸且鳴鳴矣亟以餅啖之婢謂餅硬烘之可啖媪曰奚烘為須臾啖數餅啜寒水一盂語麓氣豪如盡斗酒一生翫有矣又詰曰將無病耶曰何病也俄辭去躡之媪入僻室中閉牝跣坐

以脊尻貼席首足如張兩翼身如箕又動如轉輪馬少頃復來汗流浹體腸鳴嗚猶故也余灑然異之媪盍然而笑曰公知衛生之術乎三牛三車不僵不戕行蟻旋磨駕舟鼓檣前後上下投舍中央九虎天闕熊熊其光徑寸之珠夜吐寒芒欲學長生入室升堂左董雙成右費長房憐子鈍根如無相盲余聞之惋嘆累日恥不媪若也援筆賦詩十篇其序略曰何媪者屯氏河西村人也本農家婦善衛生術二十結褵以後遽謝鉛華八耄

鶴髮之年何其矍鑠少逢道士口傳胎息之經老養谷
神心妙參同之契若其肌膚冰雪豈非姑射名姝即此
巾幗侏儻亦是稚川佳偶謝自然非所論也華山女無
以過之今者以丹臺入道之真詮授白首傷心之病客
兔葵燕麥桃花憐我劉郎豕腹龍頭石鼎驚茲侯喜思
蕭史而未遘僕本恨人求勾漏而寄懷誰為仙吏溪山
寂歷早迷秦洞漁船雞犬飛昇莫識淮南藥器青精無
飫何以長生紫府有人皆求不死禽習五戲佩坎離水

火之數言夜守三尸探熊經鳥伸之大旨願奉教於芙蓉城下竊執鞭於玉局觀前

王鷓鴣傳

長河人有盲者善李主之術初居河肆人莫或知者余心異其人知其術之工有年矣一日來京師公卿朝士皆樂與之遊交相延譽盲意氣自豪恥為卑污之行不肯虛高人祿位以說人志客有難之者曰子之言否也什不失一二焉言泰也什不中一二焉盲捧腹大笑曰

若烏足以語此夫平適之謂泰困躓之為否也易之言
吉凶也人之情貪而願奢平適易忽而困躓難忘也馮
敬通之顯志賦愚矣劉孝標之辨命論謬矣柳子厚之
天說惑矣言泰而有不審若不自審我之言誠審矣客
喁喁者也盲姓王氏名道行凡語人語畢唱鷓鴣天詞
一闋尾作曼聲似孟達之上堵吟矣故一時號王鷓鴣
云

論曰司馬子長云士無過人之行而矯語仁義長貧賤

亦足以羞也其能工一術以驚世炫俗者正少矣鄉之
前民有管輅盲豈其儔歟

古歡堂集卷三十三